

PLAIDOYE

SVR LEQVEL A ESTE'
DONNE' CONTRE LES IESVITES,
l'Arrest du 16. Octobre, 1597.
inferé à la fin d'iceluy.



A PARIS,

Par MAMERT PATISSON Imprimeur
ordinaire du Roy.

M. D. XCVII.

Avec privilege de sa Majesté.

dup.
not cataloged



PLAIDOYE' SVR
LEQVEL A ESTE' DONNE'
contre les Iesuites, l'Arrest du
16. Octobre 1597. inseré
à la fin d'iceluy.



ARION, pour le Procureur
general du Roy, a dict,



O v s prenons en bonne part,
 comme nous estimons que la
 Cour fera, les remonstrances
 des Preuost des Marchans &
 Escheuins de Lyon, presente-
 ment leües par leur Procureur. Mesmes
 nous les loüons de ce qu'ils dient tout au
 commencement; Que depuis l'heureuse
 reduction de leur ville à l'obeissance na-
 turelle du Roy, ils n'ont iamais tant soit
 peu forligné du deuoir & bon zele de fide-

Plaidoyé

les sujets : & les exhortons à la continuation de ceste obeissance, voire à l'augmentation; si ce que nous croyõs dès ceste heure infiny, peut receuoir encore quelque accroissement. Car quoy qu'on pense auoir faict tout ce qui se peut, toutesfois nous nous deuons exciter à plus, & à surmõter, par vn effort extreme, l'extremité mesme de nostre puissance: puis que les biens-faits de sa Majesté, d'ailleurs si immenses qu'ils sembloiyēt eleuez en leur plus hault degré, ont esté neantmoins infiniment accreuz par sa constance & proüesse indicibles, suivies d'un succès surpassant l'esperance de se pouuoir faire, & presque la créace d'auoir esté faict, en la reprise de la ville d'Amiens. C'est pourquoy outre le deuoir general de sujets à leur Roy legitime; & qu'en particulier du salut du nostre depend totalement par les moyens humains le salut de nous tous; on doit encores par vn commun & naturel instinct, qui rait tout le monde à la reuerence des choses admirables, vn soin particulier, exact & curieux à la conseruation d'une si eminente & supreme vertu. Et toutesfois c'est chose asseuree que ceux qui s'arrogent le nom de Iesuites, en ont dès long temps conjuré la

ruine, & se sont deuouiez à ceste immanité. En quoy se remarque vn exemple notable des vrais presages, que Dieu (quand il luy plaist) inspire à ceux qu'il aime. Car en la cause celebrement plaidee trente ans sont & plus, sur la reception, non pas de leur ordre (qui n'a iamais esté approuué en France) mais de leur College au corps & priuileges de l'Vniuersité, les plus sages hommes de ce temps-la, vrayement excellens en la conjecture des affaires du monde, preurent dès lors, que par traitt de temps ils allumeroyent le flambeau de discorde au milieu du Royaume, & en procureroyent l'entree à l'Esgnol, qui les nous enuoyoit comme ses emissaires. Mesmes ceux qui tenoyent les charges que nous exerçons, le dirent hault & clair: & requirent par leurs conclusions, qu'on leur fermast l'entree, non seulement de l'Vniuersité, mais de tout cest Estat. Aussi la Cour par son Arrest ne les receut pas, ains appointa la cause simplement au Conseil: ce qui deuoit suspendre leur establissement. Mais (par vn malheur grandement lamentable & funeste à la France) ceste prudence moyenne & imparfaicte, qui par bonne intention disse-

Plaidoyé

roit de leur clorre, ou leur ouvrir la porte, iusqu'à ce qu'elle y eust plus meurement pensé, a degeneré petit à petit en la pire partie, par la legereté & licence du peuple, enclin à nouveautez; & par la conniuece des Magistrats, éblouis du lustre de leur hypocrisie: d'où leur est venue l'audace d'entreprendre ce qui nous a cuidé totalement ruiner: & pour raison dequoy la Cour, à bon droit, par son Arrest du mois de Decembre quatre vingts quatorze, les a releguez en Espagne d'où ils estoient venus. Ce qu'elle pouuoit faire, voire sur les seuls merites de l'ancië procès, ores qu'il ne fust rien survenu de nouveau, puis que leur reception estoit encore pendente & indecise sous la puissance de sa iurisdiction. Et combien plus festans d'abondant trouuez coupables, & de perturbation du repos de l'État, & de corruption des mœurs de la ieunesse, & du conseil de la mort du feu Roy, & finalement d'attentat à la vie de sa Majesté: dont la conscience des principaux d'entre eux remorse & agitee leur fit prendre la fuitte, & ainsi euter la peine solennelle vsitee par les mœurs de nos peres en ces impietez? En quoy nous n'auons esté que trop negligens à retenir les vns, &

trop indulgens à punir les autres, veu que pour moindres causes d'autres ordres, voire du tout receus (ce que cestuy-cy ne fut iamais en France) ont autre fois souffert, & à bon droict, plus rude chastiment. Comme celuy des Templiers, sous le regne de Philippes le Bel: & de nostre temps en Italie, celuy des Humiliez. Mesmes vn docteur Espagnol furnommé Nauarrus, en son Manuel, reduit en epitome par vn *Cap. 27.* Iesuite, aussi Espagnol, nommé Alagona, dict qu'au mois d'Octobre mil cinq cens soixante treze, il fut décidé en l'auditoire du Cardinal Osius grand Penitencier de sa Saincteté, Qu'un Espagnol, qui auoit faict vœu de se rendre en l'ordre des Cordeliers qu'on dict Conuentuels, lors receu en Espagne, d'où ce mesme ordre auoit esté depuis tollu & osté, n'estoit adstreint, outre son intention, expresse ou taisible, de rechercher ailleurs en vn autre Royau- me, où l'ordre soit encores, vn monastere qui le peust receuoir. Ce que nous recitōs plustost par ces deux liures, que par autres meilleurs: d'autant qu'il nous seruent d'argument & de preuue cōtre leurs auteurs mesmes, que si l'Espagne tant soit peu of- fensee des mœurs dissolus de ces Corde-

Plaidoyé

liers, s'en est deliuree les faisant supprimer : la France à meilleur droict, presque reduicte à sa totale ruine par la trahison & complot des Iesuites, a deu, & peu pourvoir à sa seureté. Il s'ensuit encore de ces mesmes liures contre leurs auteurs, que si quelques vns seduits par le passé en ce Royaume, auoyent faict vœu non encore accōpli, de se rēdre aux Iesuites, ils en sont aujourd'hui soluz & liberez, par le moyen de leur bānissement. Aussi les Preuost des Marchās & Escheuins de Lyon, celebrans la iustice de l'Arrest qui iuge cest exil, remarquent à bon droict par leurs remonstrances, entre les tesmoignages de leur obeissance, qu'en y obtemperāt, ils expulsèrent promptemēt de leur ville tous les Iesuites, qui s'y estoyent parauant habitez. Chose vrayement digne de loūange: mais, pour la rendre solide & fructueuse, il fault perseuerer en la mesme vigueur qu'ils eurent alors. Car il eust esté possible meilleur de laisser les choses en leur premier estat, quoy que tres-dangereux & plein d'anxiété, qu'il ne seroit de r'ouuir maintenant les portes du Royaume à ces gens irritez: veu qu'ils ont adjousté à leurs premiers vœux adstreints au Roy d'Espagne nostre ennemy

ennemy public, vn desir de vengeance ardent & furieux, de la honte & opprobre qu'ils publient par tout auoir receu de nous. De sorte qu'à present tout leur soin, estude & industrie, toutes leurs ruses, cauteles & finesse (& quelles gens au monde en ont de plus subtiles?) bref tout leur souhait, & auquel ils referent tous leurs artifices, est de rentrer en France, pour y faire pis que par le passé. C'est pourquoy sur les aduis receus de toutes parts, des diuerses pratiques tendans à ceste fin, la Cour prudemment, la matiere mise en deliberation, mesmes ayant consideré des raisons speciales qu'on ne doit diuulguer, a donné, selon nos conclusions, son second Arrest du mois d'Aoust dernier, portant defences à toutes personnes, communautez de villes, & autres quelsconques, de receuoir en public ou priué, les Escoliers ou Prestres de ceste societé, bien qu'ils voulussent dire en auoir abjuré le vœu & profession. Lequel Arrest ayans enuoyé en tous les Bailliages & Seneschauſſees pour le publier & le faire obseruer, l'execution en a esté requise en particulier, à l'egard d'un des Peres de ceste societé, surnommé Porſan, aujourdhuy retourné & faict principal du

Plaidoyé

college de Lyon. Surquoy le corps de ville a faict les remonstrances presentement leües, contenant en somme: Que Porfan autresfois a esté du nombre des furnomez Iesuites, toutesfois qu'il n'a iamais faict profession de leur ordre, & les auoit quittez dés-auparauant le premier Arrest de quatre vingts quatorze: ce qui l'a tant distraict de leur intelligence, que tout au contraire il est leur haineux, & si fort hay d'eux, qu'ils ont mesmes essayé d'empescher en tout ce qu'ils ont peu, sa reception au college de Lyon: & partant qu'il ne peut estre reputé compris ny en l'un ny en l'autre de ces deux Arrests. Pour à quoy respondre: C'est assez qu'on confesse, ce qui d'ailleurs ne se pouuoit nier, pour estre tout notoire: Que Porfan a esté dés sa iuennesse eleué, nourry, enseigné, institué, entre les Iesuites, en leur college, comme vn de leur college, & de leur societé: qu'il en a pris l'habit, la demeure & le nom, par longues annees, en plusieurs lieux, & dedans & dehors le Royaume: qu'il a leu, presché & confessé, en ceste qualité. Et qui peut donc douter qu'il ne soit vray Iesuite, ainsi que nous tenons les Iesuites en France? Car ils ont pratiqué trois especes de

vœux subalternes. L'un, comme Escoliers, en leur donnant la demeure & l'habit de leur focieté. L'autre, comme Prestres, quand ils leur attribuoyent le tiltre de Peres. Le troisieme, supreme & plus solennel, lors qu'ils les admettoient aux plus secrets mysteres de leur ordre. Lequel dernier vœu nous n'auons iamais considéré en eux : parce qu'entre nous ayant esté tenu comme reprouué, en reprouuant l'ordre, ils le nous ont tousiours couuert & caché. Ce qu'ils faisoient aussi à fin de recueillir toutes les successions qui leur pouuoient escheoir, & ne s'en dire iamais incapables, sinon apres qu'ils n'en esperoyent plus. S'en estant mesmes trouué quelques-vns qui ont herité, & disposé au profit de leur ordre, des biens de leurs parens, comme Escoliers, ou comme simples Prestres, vingt ou trente ans apres qu'ils auoyent commencé de faire en public & en particulier tous actes de Iesuites. Bref, tant que duroit l'attente de quelque succession, ils se disoyent Nouices pour la prendre, voire iusques à l'âge de plus de cinquante ans : par vn abus tres-nuisible au public, & vrayement digne d'animaduersion, ayant causé la ruine de plusieurs

Plaidoyé

bonnes & honnestes familles. Donc entre nous le surnom de Iesuites n'a point esté restreint aux religieux profez par leur vœu solennel, qui nous estoit caché: mais l'auons entendu par les qualitez seules d'Escoliers, ou Prestres, qui nous estoient notoires. Et tels sont aussi les termes des Arrests: tellement que les mots de, V O E V & P R O F E S S I O N, contenus au second, doiuent estre entendus, non de leur plus grand vœu & profession plus haulte, mais des autres moindres, que lon ne peut nier que Porfan n'ait faiçts. Entre lesquels vœux ils apportoyent vne distinction telle, que le dernier, comme le plus mystique, estoit aussi le plus irreuocable: & neantmoins que les deux precedens obligeoyent si auant l'honneur & la conscience, que l'infraction de l'essence d'iceux estoit vn crime enorme, attirant sur celuy qui en estoit coupable tant de malediction, qu'il estoit impossible qu'il peust prosperer. Tellement qu'une des apparences de la charité qu'ils disoyent auoir tresferuente & extreme à la reduction des ames déuoyees du train de leur salut, estoit de ramener à leur congregation, par tous les artifices qui se peuuent penser,

ceux qui s'en estoient ainsi diuertis, & qu'ils tenoyent en voye de ruine & perdition, pour la peine de leur apostasie. Ce qui sert de responce à ce qu'on veut dire, qu'auant mesme le premier Arrest, Porfan s'estoit departy d'auec eux, voire auec aigreur & haine mutuelle. Car la grandeur immense de nostre iuste crainte se doit eleuer en garde & desfiance, par dessus les pontilles de telles distinctions: & nous faire croire, que tous les Iesuites dès leur enfance sont si estreints ensemble, & conjurez à y perseuerer par tant d'execrations, que quelque friuuscule, quelque noise & diuorce, qui par occasion puisse arriuer entre eux, ils n'oublieront iamais pour tout cela leur premiere accointance, & se rallieront tousiours à nostre ruine. Mesmes nous en auons vn si memorable & monstrueux exemple, que s'il ne nous excite à nous en preseruer, nous serons estimez totalement stupides, & dignes du malheur qui pourra suruenir. C'est qu'apres que l'ordre mechant & detestable des freres Humiliez, s'estimant offensé du Cardinal furnomé Bonromee, eut conspiré sa mort, ils ne penserent pas qu'aucun de ceux-là, qui ouuertement estoient encores de leur

Plaidoyé

congregation, peust executer cest horrible complot; pour la desfiance que lon prenoit d'eux. C'est pourquoy ils eurent recours à vn qui s'en estoit parauant departy, que par apparence ils execroyent comme vn Apostat, & qui sous le pretexte de ceste haine, ou vraye, ou simulee par vn art de Zopyre, approchoit de si pres ce bon Cardinal, qu'ayant mesmes entree avec ses domestiques, le soir, en sa Chapelle, où il prioit Dieu, il tira sur luy, en ce saint acte, & en ce lieu sacré, le coup de pistolle qui le pésa tuer. Ce qui se cognoist par la bulle du Pape Pie quint, qui abolit tout l'ordre, pour expier ceste abomination. Mais ce Porfan (dit-on) est homme de lettres, fort propre & vtile au restablissement du College de Lyon, auiourdhuy destitué de toute autre cōduite. En quoy nous loüons la charité des peres enuers leurs enfans. Mais quel serpent hideux, quelle herbe veneneuse, quelle forte poison, n'est d'ailleurs vtile à quelque autre chose? Toutesfois, d'autant que le mal y surpasse infiniment le bien, & que le peril des inconueniens qui en pourroyent venir est mille fois plus grand, que tout le profit qui s'en pourroit tirer, on en prohibe au peuple.

l'usage & le commerce. Comme en semblable, qu'est-ce que le fruit que lon se peut promettre de cest homme, en comparaison des maux prodigieux qu'on doit craindre de luy? Mesmes quel remors, quel ver, quelle synderesse, rongeroit le cœur des habitans de Lyon, s'il aduenoit que des mains de Porfan, du sein de sa doctrine, du venin de sa langue, & des fascinations que ceux de sa secte donnent à la ieunesse soumise à leur verge, & aux fantosmes qu'ils leur peignent en l'ame, il sortist quelque iour vn second Iean Chastel? Et qu'outre le dueil, le dommage & la ruine communs en general à toute la France, si grands & immenses que nulles larmes, nuls cris, nuls soursirs, ne pourroyent suffire à les deplorer; ils eussent encores ce regret extreme en leur particulier, de penser que les Monstres, auteurs du conseil & de l'execution d'un fait si detestable, seroyent à iamais depeints & designez par toute la terre, par ces remarques honteuses à leur ville, d'auoir esté le Principal, & vn Escholier du college de Lyon? Quelle commodité, quel fruit, quel aduantage peuuent-ils proposer, qui puisse tant soit peu eleuer la balance d'un

Plaidoyé

si grand contre-pois ? Mesmes de quelle excuse se pourroyent-ils couvrir, tombans en ce malheur, par vne obstination, contre la prudence des aduis contraires qu'on leur auroit donnez : &, ce qui surpasse toute autre contumace, contre l'autorité de vos deux Arrests ? Ils sont si sages, si versez & instruits aux affaires du monde, & si respectueux enuers la Iustice, qu'ils se garderont bien d'entrer en ce hazard. Aussi declarent-ils par leurs remonstrances qu'ils sont prests d'obeir à ce qu'il vous plaira ordōner sur icelles. Parole digne du renom de leur ville, & du rang honorable qu'elle a tousiours tenu entre les illustres de la Chrestienté. Car plus les citez sont grandes & puissantes, il leur reste moins de subiect de s'accroistre, sinon par l'honneur de surpasser les moindres en la submissiō deüe aux plus viues images de la Diuinité, LES ROYS ET LA IUSTICE. Aussi voulōs-nous auoir de nostre part vn soin special de la ville de Lyon, comme de l'un des yeux de ce grand Royaume : & employer ce qu'en particulier nous auons d'industrie, & ce que nos Offices nous donnent de credit & d'autorité, pour leur aider à fournir leur College de Principal

cipal & Regens Catholiques, sages & vertueux, doctes & vſitez à former la ieuneſſe, enſemblément & aux bonnes mœurs, & aux bonnes lettres. Qu'ils enuoyent icy ceux qu'ils aduiferont pour en faire election, nous leur offrons toute noſtre aſſiſtance: & eſperons, bien que nous confeſſions noſtre Vniuerſité eſtre fort eſpuisée, qu'en y faiſant vne exacte recherche, comme en leur faueur nous la procurerons, elle ſuffira & pour nous, & pour eux: & qu'ils n'aurent ſujet de regretter deſormais les Ieſuites. Car quoy que le peuple, aſſez mauuais iuge de la literature, l'ait autrement penſé, la verité eſt que ce genre d'hommes n'a iamais bien ſceu, ny enſigné les lettres: & qu'ils ont au contraire, commencé d'eſtouffer leur pure ſemence, renée en ce Royaume ſous les auſpices du grand Roy François, pour y replanter petit à petit l'ancienne barbarie. Car ils ignorent le vray ſecret des langues, meſmes ils font vertu de les méſpriſer comme trop elegantes, & de retrancher à leur fantaſie ſous diuers pretextes, les anciens auteurs: à l'exemple de ceux qui par le paſſé nous les ont tant tronquez, qu'il nous eſt plus reſté de leurs epitomes,

Plaidoyé

que de liures complets. D'ailleurs la Philosophie, qui est vraiment la Roine des sciences humaines, doit estre puissee, pour la voir naifue, en la pure source des liures d'Aristote, dont les Iesuites n'enseignent que le nom, & mesprisans son texte suivent les ambages des vaines questions tirees de la lie des Docteurs scholastiques. Bref, ils ont esté plus propres à corrompre les lettres, qu'à les illustrer : vfans en cela du mesme artifice dont ils se sont seruisés autres choses plus graues & plus sainctes. C'est que pour attirer à eux toute la multitude, ils soulageoyent le simple populaire de quelques petits fraiz : comme, de ce qu'on donne par loüable coustume pour vne confession, pour vne leçon, pour vne figure, & autres semblables : & se reseruoient de prendre en gros, d'assez peu de personnes, cent fois plus que ne vault tout ce menu detail. Ce qui les cōbloit de biēs & d'Escoliers, à la diminution des autres Colleges, & des gens doctes qui y souloiēt florir : parce que voyans leur frequence tournee en solitude, & leurs moyens reduits à la necessité, l'honneur & le loyer qui nourrissent les arts, ainsi courts & descheuz, faisoient descheoir les hommes.

Mais depuis ce peu d'annees, que les Iesuites ont esté chassez, & par ce moyen l'estude & l'industrie, la sueur & les veilles en commun inuitees à la gloire & au prix de la doctrine, cōme par le passé; l'ardeur genereuse, qui de iour en iour reschaufe le courage des plus beaux esprits, nous fait conceuoir vne bonné esperance de reuoir desormais ce Royaume illustré de la mesme splendeur des arts & disciplines, qui y souloit reluire plus viue & plus claire qu'en nul autre lieu de la terre cogneüe, auant que les Iesuites l'eussent obscurcie. Mesmes d'autant que sa Majesté, tenant d'une main le Laurier de Triomphe, & de l'autre l'Oliue de Sageffe, les daigne tēdre ensemble à l'Estat, & aux Muses, pour les releuer de leur cheute commune, & presque du tombeau. Il reste vne chose en ces remonstrances, que nous ne pouuōs dissimuler sans faulte, ny dire sans regret. C'est que par cy par là on y voit des scintilles, tesmoignās assez que les cendres des diuisiōs passees, qui ont presque embrasé ceste bōne ville, ne sont pas encore du tout refroidies. Ce qui nous excite à les admonester d'esteindre promptemēt toutes ces flāmes, & sans s'entrepiquer, ny viure en des-

Plaidoyé

fiâce les vns des autres, se laisser desormais totalement conduire par la sagesse inspirée de Dieu au cœur de nostre Roy, qui le manie, le dispose & l'incline, comme le cours des eaux: & sous sa Majesté, par la prudence de ce grand Parlement: & par la vigilance de leur Gouverneur. Croyans fermement que sans se rendre trop subtils à chercher les causes des affaires, qui ne leur doiuent pas tousiours estre cogneües, ils seront mieux regis par ces puissances iustes & legitimes, establies de Dieu pour leur conseruation, que par leur propre sens, & par les mouuemens de leurs priuez desirs. Dont nous ne pourrions leur proposer vn exemple plus propre, que celuy qui naist de cest affaire mesme. Car en donnant à Porfan la principale charge de leur College, ils ont pensé auoir tresbien pourueu à ce qui leur est plus cher & important que nulle autre chose, apres l'honneur de Dieu, & le salut du Roy & de l'Estat. Et neantmoins les informations faictes à nostre requeste contre ce Porfan pour cas particuliers, & le decret de prise de corps que la Cour par arrest y a interposé, nous font cognoistre, qu'outré ce qu'on doit craindre en commun des Iesuites, leur


ieunesse d'ailleurs estoit commise en main
tres-perilleuse, & couroit le hazard d'estre
imbeüe de tres-mauuaisës mœurs. Ce
qu'ils doiuent croire à nostre recit, sans de-
sirer d'en sçauoir dauantage quāt à present.
Car nostre office à bon droict peut em-
prunter ces mots de Cassiodore : Tout ce
que nous faisons est vrayement public,
& neantmoins par ce que la plus part des
moyens qui y seruent, ne doiuent estre
sceus, sinon quand les affaires ont pris leur
perfection : nous deuons ce pendāt auoir
autāt de soin de les tenir cachez, que d'au-
tres ont d'enuie de les decouurir : à l'exē-
ple des archiues fermees, qui ne respōdent
rien à ceux qui les enquerent, & leur dient
tout quand elles sont ouuertes. Quelque
iour donc, & quand il sera temps de ren-
dre le secret de la Iustice notoire à tout le
monde, les habitās de Lyon cognoistront
tout à clair, que riē n'y a esté, & n'y sera fait
que par bōne raison, & pour leur grād pro-
fit : & que la Cour, inspiree de Dieu, du-
quel elle exerce les iugemēs, est autant ele-
uee en prudēce & sagesse sur ses inferieurs,
comme elle les surpasse en puissance & en
autorité. PARTANT nous requerons,
Que sans auoir esgard aux remonstrances

Cassiodorus
Variar. 6.

*Publicum est
quidem omne,
quod agimus:
sed multa non
sunt antē sciē-
da, nisi cūm
fuerint, Deo
auxiliāte, per-
fecta: quæ tā-
tō plus debent
occuli, quantō
amplius de-
siderantur
agnosci. Regis
cōsiliū solos
debet scire gra-
uissimos. Imit-
tari debēt ar-
maria, quæ
continent mo-
numēta char-
tarū, ut quan-
do ab ipsis a-
liqua instru-
ctio queritur,
Ecce.*

Plaidoyé

presentement leües, l'Arrest du xxj. Aoust dernier soit executé en la ville de Lyon, mesmement à l'esgard de Porfan: & neantmoins, auparauant qu'il sorte du Royaume, qu'en executant le decret de la Cour, il soit pris au corps, & rendu prisonnier en la Conciergerie, pour ester à droict.



Extraict des registres de Parlement.

Du Ieudy seizieme Octobre, 1597.

Eiour, sur ce que Marion pour le Procureur general du Roy a dict en la Chambre des vacations, que de l'ordonnance d'icelle ils auroyent mis és mains de Ballon Procureur en la Cour, & Procureur des Preuost des Marchans & Escheuins de la ville de Lyon, les remonstrances leües en l'assemblee generale faicte en l'hostel commun de ladite ville de Lyon, le xx. Septembre dernier passé, & par eux enuoyees audit Procureur general sur l'execution de l'Arrest du xxj. Aoust aussi dernier, par lequel defenses sont faictes à toutes personnes, corps & communantez, de receuoir aucuns des Prestres & Escoliers, eux disans de la

Societé du nom de Iesus, encores qu'ils eussent abiuré & renoncé au vœu de profession par eux fait, sur les peines y contenues. Auquel Ballon auroit esté enjoint dès mardy dernier, d'en aduertir le conseil desdits Preuost des Marchans & Escheuins, & en venir ce matin. Iceluy Ballon ouy en ladite Chambre, qui a dict auoir fait entendre l'ordonnance cy dessus à maistre Barthelemy Thomé, Secrétaire de ladite ville de Lyon, estant de present en ceste ville, lequel luy a fait responce n'auoir aucuns memoires & instructions à cest effect. Et apres que ledit Ballon, de l'ordonnance de ladite Chambre, a fait lecture desdites remonstrances: & que Marion, pour ledit Procureur general a dict, qu'elles ne sont considerables pour les raisons par luy deduites: Requerant que sans y auoir esgard ledit Arrest du xxj. Aoust soit executé en ladite ville de Lyon, mesmes à l'égard de Porsan denomé esdites remonstrances. Et neant moins qu'au parauant ladite execution cōtre iceluy Porsan, il soit amené prisonnier en la Cōciergerie du Palais, suiuant l'Arrest de prise de corps contre luy decerné par ladite Chambre, pour luy estre son procès fait & parfait sur les charges & informations contre luy faites: avec injonctiō au Substitut dudit Procureur general sur les lieux, d'en faire les diligences. Offrans au surplus ausdits Preuost des Marchans & Escheuins les assister pour leur faire trouuer vn Princi-

Plaidoyé contre les Iesuites.

pal & Regens Catholiques, doctes & vertueux, pour l'instruction de la ieunesse en ladite ville de Lyon. Eux retirez, & la matiere mise en deliberation,

LADITE Chambre, sans auoir esgard ausdites remonstrances, a ordonné & ordōne que ledit Arrest du xxj. Aoust dernier, sera executé en ladite ville de Lyon, selon sa forme & teneur: mesmes à l'esgard dudit Porsan, qu'elle a déclaré & declare compris en iceluy. Et neantmoins ordonne suiuant l'Arrest du xxv. Septembre dernier, qu'iceluy Porsan sera pris au corps, & amené prisonnier en la Conciergerie du Palais: Pour estre ouy & interrogé sur le contenu és informatiōs cy deuant faiçtes, & procedé à l'encontre de luy ainsi que de raison. A enjoinct & enjoint au Substitut dudit Procureur general en la Seneschancee & siege Presidial de Lyon, faire executer le present Arrest, & certifier la Cour de ses diligences, au mois. Et pour la conduite & direction du College de ladite ville de Lyon, sera pourueu de Principal, Regens, & autres personnes suffisans & capables ainsi que de raison. Et sera le present Arrest executé par vertu de l'extraict d'iceluy.

signé,

DV TILLET.



